

Uunga siunnersuut:**Tupanit nioqqtissat aamma tupanut taarsiunneqarsinnaasut pillugit Inatsisartut inatsisaat****Kapitali 1***Atuuffia aamma nassuiaatit*

§ 1. Inatsisartut inatsisaat tupanit nioqqtissanut aamma tupanut taarsiunneqarsinnaasunut atuuppoq, nakorsaatit akuerisat pinnagit.

Imm. 2. Inatsisartut inatsisaat Pituffimmi sakkutooqarfimmi, illersornissamut tunngasut pillugit Kalaallit Nunaata, Danmarkip Amerikamilu naalagaaffeqatigiit naalakkersuisuisa illersornissaq pillugu isumaqatigiissutaanni pineqartunut ilaatinneqartumi atuutinngilaq.

§ 2. Tupat tassaapput piluttat tupallu naasuata ilaanit pinngortitameersut (Nicotiana) suliarineqarsimasut suliarineqarsimanngitsullu, tassunga ilanngullugit tupat imartussutsikkut annertusakkat aamma tupat assingusumik sanaqqitat.

Imm. 2. Tupanit nioqqtissiat tassaapput nioqqtissiat, sananeqaatsimikkut allanngortinneqarsimagaluarpalluunniit tamakkiisumik ilaannakortumilluunniit tupanik akullit.

Imm. 3. Tupanut taarsiunneqarsinnaasut tassaapput tunisassiat nikotinitallit, tupanit nioqqtissaanngitsut taamaattoq tupanit nioqqtissiatut atorneqartussiat imaluunniit atorneqarsinnaasut.

Imm. 4. Sukuluut tassaapput imm. 2-mi taaneqartut tupanit nioqqtissiat aamma imm. 3-mi taaneqartut tupanut taarsiunneqarsinnaasut oqummiartakkat, tupanit tunisassiat tunisassialluunniit nikotinitallit tamarmik oqummiarneqarsinnaasut, najuussorneqartartut imaluunniit tamuaneqarsinnaasut pinnagit ilaatigullu tupartallit imaluunniit taakkunanga pulverit partikkililluunniit taakkunangaluunniit akuleriisitat kiisalu nikotinitallit.

Imm. 5. Sikaritsit elektroniskiusut (e-sikaritsit) tassaapput tunisassiat elektroniskiusut imm. 2-mi taaneqartunik tupanit nioqqtissianik, imm. 3-mi taaneqartunik tupanut taarsiunneqarsinnaasunik imm. 6-miluunniit taaneqartunik e-væskenik imalinnik atuinermut atorneqarsinnaasut milluaavillit tunisassialluunniit ilaannakortui, tassunga ilanngullugit patronit, taakkunungalu immerfissat immeqqinneqarsinnaasut kiisalu patroneqanngitsut imaluunniit immeqqinneqarsinnaanngitsut.

Imm. 6. E-væskit tassaapput e-sikaritsit imassai imerpalasut imaluunniit isserit, aalanngortitassat, nikotinitaqaraluarunik nikotinitaqanngikkaluarunilluunniit.

Imm. 7. Tupat tamuasakkat tassaapput tupanit nioqqtissat pujoqanngitsut, taamaallaat tamuaneqartussat, tassunga ilanngullugit sukuluussat.

Imm. 8. Nioqqtissat nikotinit sorlukkoortakkat tassaapput tupat tupanulluunniit taarsiunneqarsinnaasut nioqqtissat pujoqanngitsut qingakkut atorneqarsinnaasut, tupanik nikotininilluunniit ilaatigut seqtsikkanik imaluunniit sananeqaatinik akullit imaluunniit taakkunanga akuleriisitat.

Imm. 9. Mamarsaasikkat tassaapput tupasunniinnarnatik ersarissumik mamassusillit imaluunniit tipigissut, taakkulu akuutissianik ilallugit imaluunniit akuleriissillugit tikki, aamma tunisassiamik atuinneginnarmi atuinerullu nalaani naamaneqarsinnaasut mamaaluunniit malugineqarsinnaasut.

Imm. 10. Aniatitsinerit tassaapput akuutissat tupamik tupanut taarsiunneqarsinnaasulluunniit siunertaanut naapertuuttumik atornerani putsumiillutik aniasartut imaluunniit akuutissat nioqutissanit atuinermut atatillugu aniatinneqartut.

Imm. 11. Allat pujortarnerisigut putsumik najuussuineq tassaavoq e-sikaritsip, tupanit nioqutissap imaluunniit tupanut taarsiunneqarsinnaasut aniatitsinerisa silaannarmut avatangiisaasumut akuliullutik mingutsitaannik najuussuineq.

Kapitali 2

Eqqussuinermi tuniniaanermilu killilersuutit

§ 3. Ukuningga tunisassianik tuniniaanissaq, tunniussinissaq, sananissaq, suliaqarnissaq, allatigulluunniit niuernissaq inerteqqutaavoq:

- 1) Sunoorsit, tupat tamuasakkat, sukuluussat nioqutissalluunniit nikotinit sorlukkooortakkat.
- 2) Tupanit nioqutissat mamarsaatitalit.
- 3) Tupanik nioqutissat vitaminitallit imaluunniit allanik akuutissallit atuisunut tupamik peqqinnartutut saqqummersitsisut imaluunniit killeqartumik peqqissutsimut ulorianaateqarsinnaasutut saqqummiussat.
- 4) Tupat aniatitsinermi qalipaateqalersartunik akuutissallit.
- 5) E-sikaritit aamma e-væskit.
- 6) Tupanut taarsiunneqarsinnaasut.

§ 4. Inuit 18-iliineqanngitsut tupanit nioqutissanik eqqusseqqusaanngillat nioqutissat taakku unioqutitsinatik pigilersimagaluarpatigilluunniit.

Kapitali 3

Tupanik nioqutissanik tuniniaaneq

§ 5. Tupanik nioqutissianik niuerniarneq pisiniartitsisumit toqqaanaq pisinneqarnikkut taamaallaat pisinnaavoq.

Imm. 2. Imm. 1 naapertorlugu pisiniartitsisumit toqqaanaq pisinneqarnissamik saneqqutsinissaq pillugu Naalakkersuisut erseqqinnerusunik malittarisassanik aalajangersaasinnaapput.

§ 6. Tupanik nioqutissiat ataasiakkaarlugit tuniniaqqusaanngillat. Sikaanik tuniniaaneq ilaatinneqanngilaq.

Imm. 2 Sikaritsit poortakkaarlugit 20-nit ikinnerusunik imallit tuniniarneqaqqusaanngillat.

§ 7. Tupanik nioqqutissat 18 inorlugit ukiulinnut tuniniaqqusaanngillat.

Imm. 2. Inuk 18-inik ukioqalersimanerminik pisariaqartumik uppersaateqarnersoq nioqquteqartup pisiniarfimmilu piginnittup qulakkiissallugu akisussaaffigaat.

Imm. 3. Pisiniarfiit tupanik nioqquteqarfiusut ersarissumik allagartaliinikkut ilisimatitsissapput 18-it sinnerlugit ukiulinnut taamaallaat tupanik nioqqutissianik pisititsisoqarsinnaasoq.

Imm. 4. Allagartat ilusaat, ersarissusaat il.il. pillugit Naalakkersuisut ersarinnerusunik malittarisassiorsinnaapput.

§ 8. Inuit 18 inorlugit ukiullit niuertarfinni sulisutut toqqaannartumik tupanit nioqqutissianik tuniniaatinneqassanngillat.

Tupanit nioqqutissianik nalunaaqutsersuineq

§ 9. Tupamik atuinerup peqqinnissamut peqqinnermullu navianartumik sunniuttarneranik mianersoqqussumik ersersitsisumik tupanit nioqqutissat tamarmik erseqqissumik nalunaaqutserneqarsimassapput.

Imm. 2. Mianersoqqussutit kalaallisut danskisullu allassimassapput.

Imm. 3. Tupanit nioqqutissat ilusaat nalunaaqutsernerilu pillugit piumasagaatit, imm. 1-milu saneqqutsinissaq pillugit Naalakkersuisut sukumiinerusumik malittarisassianik aalajangersaasinnaapput.

§ 10. Tupanit nioqqutissat tamarmik tuniniarneqartut qanoq annertutigisumik usserummik (tjære), kuliltemik nikotinimillu akoqarnerat pillugit paasissutissaqartinneqartassapput.

Imm. 2. Paasissutissat imm. 1-mi taaneqartut kalaallisut danskisullu allassimassapput.

§ 11. Tupanit nioqqutissianik tuniniaasup qulakkiissavaa poortat ataasiakkaat ilaatigullu aamma taakku puui ukuninnga ilaqaratik ersiuteqassanngitsut, soorlu

- 1) tupanit nioqqutissat ilisarnaataannik, sunniutaannik, navianassusaannik aniatitsinerannilluunniit eqqunngitsumik paasineqarsinnaasumik saqqummiussineq atuinissamik kajumissarinerluunniit,
- 2) tupanit nioqqutissat aalajangersimasut allanit ajoqusiisinnaannginnerusutut imaluunniit putsup akuisa ilaannik aalajangersimasunik annikinnerusumik ajoqusiisinnaasutut paasineqarsinnaasumik ersersitsineq,
- 3) tupanit nioqqutissat inuummarinnartutut, nukissaqalersitsisutut, peqqissinartutut, inuusussinartutut, pissusissamisoortutut, pinngortitamullu naviananngitsutut allatulluunniit peqqissutsimut inooriaatsimulluunniit pitsaasumik sunniuteqartartutut paasineqarsinnaasumik ersersitsineq,
- 4) mamassutsinut aamma tipinut mamarsaatinut innersuussineq imaluunniit tunisassiaq akuutissianik taakkuninnga akoqannginneranik paasititsineq,
- 5) tunisassiap nerisassanut imaluunniit pinneraatinut assingulersinnera, imaluunniit

6) tupanit nioqutissat ilaat aalajangersimasoq avatangiisinit arrortikkuminarnerusutut avatangiisinulluunniit allanik pitsaaquteqartutut paasineqarsinnaasutut ersersitsineq.

Imm. 2. Ilusaat nalunaaqutsernerilu pillugit piumasaqaatit pillugit Naalakkersuisut sukumiinerusumik malittarisassanik aalajangersaasinnaapput, takuuk imm. 1.

Tupanit nioqutissanik pilerisaarineq

§ 12. Tupanik nioqutissiat allagarsiussatigut, allagartarsuartigut allatigulluunniit pilerisaarutigineqaqqusaanngillat.

Imm. 2. Inertequt nalunaarsuutinik, ilisarnaatinik allanilluunniit takussutissiisunik atuinikkut unioqputinneqaqqusaanngilaq.

Imm. 3. Inertequtinut ilaanngillat aviisit, atuagassiat, aviisit assiliartalersukkat assigisaallu immikkut kalaallit nunaanni nioqquteqarnermut attuumassuteqanngittut Nunatsinnut eqqunneqartartut.

§ 13. Tupanit nioqutissat pisinianut takuneqarsinnaasumut inissinneqassanngillat.

Imm. 2. Taamaattorli imm. 1-imi tuniniaavinni ornigulluni pisiniarfigineqarsinnaasuni pisiniartitsisup karsiata eqqaani tupanit nioqutissat sorliit tuniniarneqarnersut nioqutissallu akii pillugit pilerisaarerpalaanngitsumik paasissutissanik ilisisoqarsinnaavoq.

Imm. 3. Naalakkersuisut imm. 1-2-mi taaneqartut pillugit sukumiinerusumik malittarisassanik aalajangersaasinnaapput.

§ 14. Tupanit nioqutissat akeqanngitsumik misilitassatut tunniunneqaqqusaanngillat.

Kapitali 4

Avatangiisit pujortarfiunngitsut

§ 15. Kapitali una makkunani atuuppoq:

- 1) pisortat suliffeqarfiutaanni,
- 2) aktiaateqarluni piginneqataassuteqarlunilu ingerlatseqatigiiffiit pisortanit pigineqartuni,
- 3) namminersortut suliffiutaat qulinik taakkuluunniit sinnerlugit sulisulinni,
- 4) ilinniarfinni, meeqqanik paaqqinnittarfinni, ulluunerani paarsisartut ilanngullugit aamma ulloq unnuarlu paaqqinnittarfiit, paaqqutarinniffittut angerlarsimaffiit, ilinniartut ineqarfii kiisalu suliffeqarfiit taakkununga assersuunneqarsinnaasuni,
- 5) inini kikkunnilluunniit isersimaffigineqarsinnaasuni,
- 6) taxani inunnillu amerlasuunik angallassissutini,
- 7) neriniartarfinni, cafeni allaniluunniit kikkunnut tamanut sassaallerfiusartuni,
- 8) inini pisortanit pigineqartuni, aamma
- 9) inissiani ineeqqani unnuisarfiillu assigisaanni inuussutissarsiornermi atorneqartartuni.

Imm. 2. Inatsisip atuuffigisaani kap. 4 naapertorlugu, inatsimmi aalajangersakkani allani allatut aalajangersaasoqanngippat illup iluani pujortarneq inerteqputaavoq.

Imm. 3. Naalackersuisut malittarisassanik immikkut ittunik illup iluani pujortarsinnaatitsisunik aalajangersaasinnaapput.

Imm. 4. Naalackersuisut inini pujortarfiusinnaasuni sulisut allallu tupap pujuanik najuussuinissannut illersorneqarnissaat qulakkeerniarlugu malittarisassanik aalajangersaasinnaapput, matumani pujortartut pujortarnerlu ajortut immikkoortinneqarnissaat aamma sanaartukkatigut aaqqiissutit allat pillugit malittarisassat ilanngullugit.

§ 16. Inatsisip atuuffigisaani kap. 4 naapertorlugu, inatsimmi aalajangersakkani allani allatut aalajangersaasoqanngippat silami pujortartarfiliortoqarsinnaavoq.

Imm. 2. Silami pujortartarfiornermi:

- 1) immikkut inissinneqassaaq ammasuussallunilu,
- 2) ininit allanit avissaartillugu inissinneqassaaq, taamaattoq imm. 5 takuuk, aamma
- 3) silammut ammaannartumik silaannarissarfilerlugit, anorimut sialummullu oqquiffissalernerqassapput.

Imm. 3. Silami pujortartarfinni sikaritsikooffinnik matoqqasunik ikkussuisoqassaaq.

Imm. 4. Pujortartarfiit silamiittut sananeqassapput pujortarnermut atugassiatut, siunertanullu allanut atorneqassanatik.

Imm. 5. Imerniartarfiit, natklubbit sutorniartarfiillu unnuakkut ammasartut illumut pioreersumut ilassutit atsumik silami pujortartarfiliorsinnaapput.

§ 17. Meeqqanik paaqqinnittarfinni, atuarfinni, atuareersunut paaqqinnittarfinni, meeqqat inuusuttullu ulluunerani ornittagaanni assigisaannilu pineqartut silataanni nunaminertani pujortarneq inerteqqutaavoq.

Imm. 2. Naalackersuisut silami nunaminertani meeqqanit inuusuttunillu sammisassaqtitsinermut atorneqartuni pujortaqqusinninnermut malittarisassanik aalajangersaasinnaapput.

§ 18. Namminerisamik angerlarsimaffinni meeqqanik atualersimanngitsunik ulluunerani paarsaqarfiusartuni meeqqat paarineqarnerisa nalaani illup iluani pujortartoqassanngilaq.

Imm. 2. Inini meeqqanut pinnguarterfittut isersimaarterfittullu atorneqartuni pujortarneq inerteqqutaavoq.

§ 19. Paaqqutarinniffittut angerlarsimaffinni, ulloq unnuarlu paaqqinnittarfinni, najugaqarfissatut neqeroorutini, ilinniartut ineqarfiini assigisaannilu inunnit 18-it sinnerlugit ukiulinnit arlalinnit najugaqarfigineqartuni namminerisamik angerlarsimaffittut atuuttuni najugaqartut ataasiakkaat 18-it sinnerlugit ukiullit ineeqqami inissiamiluunniit angerlarsimaffittut najugaqarfigisaminni pujortarsinnaapput.

Imm. 2. Paaqqinniffimmi sulisut najugaqartullu allat pujortarnerisigut najuussuinissaannut illersorniarlugit paaqqinniffik sunniuteqarluartunik suliniuteqassaaq. Sulisut ineeqqami inissiamiluunniit namminerisatut angerlarsimaffittut atuuttumi isersimatillugit pujortartaqqunagit paaqqinniffiup najugaqartut peqqusinnaavai.

§ 20. Namminerisamik angerlarsimaffinni pisortanit kiffartuunneqarfiusuni, soorlu inummut suliassanullu allanut ikiorteqartitsiviusuni taakkunanit pisortanit kiffartuussinermut piumasagaatitut najugaqartoq peqquneqarsinnaavoq piffissami sulisut najugaqartup inigisaaniiffiisa nalaani pujortartaqqunagu.

§ 21. Sulisitsisut qulinit amerlanernik sulisullit pujortartarneq pillugu allaganngorlugu politikkilliussapput.

Imm. 2. Politikkimin minnerpaamik imaritinneqassapput:

- 1) sulisut sulinerminni pujortarsinnaanersut isummerfiginnineq,
- 2) silami pujortartarfeqarnerseq sumiinnorsorlu pillugu paasissutissaq, aamma
- 3) pujortarunnaarnissamut pikkorissaasoqartarneranik neqeroorteqarnerseq.

Imm. 3. Sumiiffimmi aqutsisup qulakkiissavaa pujortarnermut politikkit sulisunit tamanit ilisimaneqarnissaat kiisalu suliffiup iluani pujortaqqusaannginneq pillugu sulisunut allaganngorlugu ilisimatitsissutigissallugu.

Imm. 4. § 17 aamma § 19 naapertorlugit sumiiffimmi aqutsisoq allaganngorlugu pujortartarnermut politikkimik suliaqassaaq, tassani nalunaarutigalugit pujortarnissamut inerteqquteqarneq, Inatsisartut pisinnaatitsissutaat kiisalu inatsisartut aalajangersagaannik unioqquitsinermi kingunerisassai. Tamatuma saniatigut pujortarunnaarnissaq pillugu pikkorissarnernut imaluunniit allatigut pujortarunnaarnissamut innersuussisoqassaaq.

§ 22. Naalackersuisut nakkutilliineq pillugu malittarisassanik aalajangersaasinnaapput, matumanilu suliassamik taassuminnga suliaqarniarnermi oqartussanik allanik suleqateqarnermut tunngasunik.

Kapitali 5

Pineqaatissiisutit

§ 23. Akiligassiinermik pineqaatissiisoqarsinnaavoq:

- 1) § 3, nr. 1 - 6-mi taaneqartunik tunisassianik tuniniaasunut, tunniussisunut, sanasunut, suliaqartunut allatigulluunniit niuertunut,
- 2) inunnut 18 inorlugit ukiulinnut § 4 unioqqustillugu nunatsinnut eqqussisunut,
- 3) § 5, imm. 1, § 6, § 7, imm. 1 imaluunniit imm. 3 unioqqustillugu tupanik tunisassianik tuniniaasunut,
- 4) inummik 18 inorlugit ukiulimmik § 8 naapertorlugu niuertarfimmi tupanik tunisassianik toqqaanaq tuniniaatitsisumut,
- 5) tupanik nioqquutissianik § 9, imm. 1 aamma imm. 2 imaluunniit § 10 naapertorlugu ersarissumik nalunaaqutsersuisimanatik tuniniaasunut,
- 6) tupanik nioqquutissianik § 11, imm. 1-mi allassimasunik ilaqartunik ersiuteqartunilluunniit tuniniaasunut,
- 7) § 12 unioqquutillugu tupanik tunisassianik ussassaarisunut,
- 8) § 13 unioqquutillugu tupanik tunisassianik takuneqarsinnaasumut inissiisunut,
- 9) § 14 unioqquutillugu tpanik tunisassianik akeqanngitsumik tunniussisunut,

10) § 15, imm. 2 aamma § 18 unioqutillugu illup iluani pujortartunut,

11) § 16, imm. 2, imm. 3 imaluunniit imm. 4-mi piomasaaqatit eqquutsinnagit silatimi pujortartarfiliortumut,

12) § 17, imm. 1-mi taaneqartuni silatini pujortartunut,

13) § 21 naapertorlugu suliffeqarfinnut allaganngorlugu pujortartarnermut.

Imm. 2. Unioqutitsinerni imm. 1, nr. 3, 5, 6 imaluunniit 9 ilanngunneqartuni, pineqaatissiisoqarsinnaavoq tupanik tunisassianik arsaarinninnikkut.

Imm. 3. Malitassani Inatsisartut inatsisaat tunngavigalugu atuuttussanngortinneqartuni pineqatissiinerit aalajangersarneqarsinnaapput akiliisitsineq arsaarinninnerlu Kalaallit Nunaanni pinerluttulerinermi inatsimmi malittarisassat malillugit.

Imm. 4. Inatsisartut inatsisaat imaluunniit malitassat Inatsisartut inatsisaat tunngavigalugu aalajangersarneqartut akileeqqusissummik arsaarinninnermilluunniit pineqaatissiisoqarnissaanik aalajangersaanissamik tunngavissaqartitsippata, pineqaatissiissut Kalaallit Nunaanni pinerluttulerinermi inatsimmi malittarisassat malillugit inatsisitigit pisussaataasoq pisinnaatitaasorlu pineqaatissiissummik pisussaaffilerneqarsinnaavoq.

Imm. 5. Inatsisartut inatsisaat naapertorlugu malitassallu tamatuminna aalajangersarneqartut malillugit akiliisitsinermi akiliutigineqartut Nunatta Karsianut nakkartinneqassapput.

Kapitali 6

Atuutilersitsinermut, atorunnaarsitsinermut ikaarsaariarnermilu aalajangersakkat

§ 24. Inatsisartut inatsisaat 15. januar 2025 atuutilissaaq, taamaattoq tak. imm. 4.

Imm. 2. Tamatuma peqatigisaanik uku atorunnaarsinneqarput:

1) Tupa avatangiisinillu tupatorfiunngitsunik isumannaarineq, kiisalu tupanik nioqutissat nalunaaqutserneqartarneri pillugit Inatsisartut peqqussutaat nr. 10, 14. november 2004-meersoq.

2) Pujortarnermik inerteqquteqarneq pillugu Inatsisartut inatsisaat nr. 15, 26. maj 2010-meersoq.

Imm. 3. Imm. 2-imi taaneqartut naapertorlugit maleruagassat atulersinneqarsimasut Inatsisartut inatsisaanni matumani maleruagassat aalajangersarneqartut tunngavigalugit taarserneqarnissamik atorunnaarsinneqarnissamillu tungaanut atuutiinnarallassapput.

Imm. 4. Taamaattoq tuniniaanissamut inerteqquteqarneq § 3 aamma § 6, imm. 2-mi taaneqartut aattaat 31. marts 2025 atuutilissapput.

Namminersorlutik Oqartussat, ulloq xx. xxx 2024

Naalakkersuisut Siulittaasuat